



FAKASOLOGA O MATAUPU

Taugasoa Kelisiano.....	1-2
Lauga o te Fono Lasi.....	2-3
Sukesukega Tusi Tapu.....	3-7
Fakafeagai mo niisi Talitonuga.....	7-8
Mataupu Silisili.....	8-11
Mo Kauvaka.....	11-12
Mo Talavou.....	12-13
Tala mai i te Fono Lasi.....	13-16
Posting 2015 – 2018.....	16-17
Mo Fafine.....	17
Mo Tamaliki.....	17-18
Fanau Fauu a te Ekalesia.....	19-20
Ata o te Fono Lasi.....	21



TAUGASOA KELISIANO

Rev. Tofiga Falani

Tokolua Pelesitene

I te avanoga gali kae taua tenei, ko fai ei a au mo sui o te 'Malu o te Pelesitene o te Ekalesia Kelisiano Tuvalu, Faifeau Penitusi Taeaia, tela ne filigina kae ne fakamaonigina i te 23 Fonotaga Lasi a te EKT i te fenua ko Niutao, Setema 2014.

Ko oko eiloa toku fiafia o fakaoga te avanoga gali kae taua tenei o fakatomua atu a te lomiga tenei ki se fakatalofaga faka taugasoa Kelisiano kia koutou katoa loa "Talofa" i te igoa o Iesu Keliso!"

E muamua eiloa a vikiga mo te fakafetai ki te Aliko te Atua alofa, aua me ko a iku mo te manuia, te gali mo te lelei a te faiga Fonotaga Lasi 23 a te Ekalesia Kelisiano Tuvalu tela ne tali alolimagina kae fakaalologina ne te 'malu o te ekalesia pela foki te fenua o tatou ko Niutao i te fakaotiga o Aukuso ki a Setema 17 i te tausaga tenei.

Au e talitonu me tasi a te agaga mo te lagona ne oko ki 'malu o usu fono katoa kola ne i ai kae ne molimaugina fakatasi mo tatou katoa, fakatasi mo te 'malu o te tapuakiga i tulaga faka te fekau mo te galuega. Suga ite tavini faifeau mote faletua, te tiakono toeaina, te kau faigaluega, mo te malu o te Ekalesia mote kaulotu i Niutao. E pena foki mote lago malo mai i tulaga o te malu o te Ulu Aliko mo tena kaiga aliki, te malu o te pule Kaupule mo tena

kaiga Kaupule, te 'malu o te pouloto o Fetu Afiafi III, i ona toeaina, ona 'lomatua, tagata mo fafine, te malosiga, ke oko ki tino katoa o te fenua gali o tatou ko Niutao. Ko toe fai toku leo fatauva i te lomiga tenei, e sui atu ei tena 'Malu te Pelesitene o te Ekalesia Kelisiano Tuvalu, o toe molimoli atu a loto mo agaga o matou katoa usufono, a te agaga fiafia, lilifu katoatoa kae fakafetai Niutao i tau teu mo tau fakaaloalo tafa ki luga, koa oti ne fakaasi kae ne fakatino ne koulua te Ekalesia mo te fenua o Niutao i te faiga fonotaga lasi i luga i te oulua fenua. Ko omotou talosaga ke toe ligi fakaua atu ne te Atua a ana fakamanuiaga ki te fenua mo koutou katoa i feitu e uke valevale kae kesekese mo koutou. Fakafetai lasi lasi, ke manuia tatou katoa i te alofa atafai mai o te tou Aliko.

Te Ekalesia Kelisiano Tuvalu, i Ekalesia mo Kaulotu iloto mo tua o Tuvalu, ko toe fakaoko atu kae molimoli atu foki a te fakafetai lasi mote fakamalo kia koulua katoa mo tusaga ko a oti ne fai kae ne fakatino ne koulua, kae maise ite mafai o suigina mai a malu o aulua Ekalesia mo koutou usufono kite faiga 23 Fonotaga Lasi 2014. E fai toega te lua fakatinoga mo te fakafoligaaga o te muna tuku tela ne fai mo fakaautuuga o lagona o manatu fakaasi ke oko ki lagona o te Fono Lasi. MANAVA MAI TOU MANAVAGA OLA (Esekielu 37:1-14)

Te malu o taugasoa Kelisiano faitau Lama, mo te Ekalesia o Tuvalu i loto mo tua o Tuvalu, ea, ka pefea o fakatuaga kae fakana a tatou kite Aliko o te Lagi mo te lalolagi kote mea ke mafai o manava mai a tona manavaga ola kia tatou taki tokotasi, ke oko ki otou Ekalesia mo Kaulotu, ia pena foki ki tena Ekalesia Kelisiano Tuvalu, ko te mea ke mafai ai o lavea ne tatou, me e mafai o maua se malosia fou faopopo mo tatou mo otou ola tavini tautua mo tena fekau mo tena galuega kae koi ola tatou ite olaga taumafai tenei.

Mo taugasoa Kelisiano kola e maua a avanoaga o faitau kite Lama. Ke fakana kae fakamoemoe tatou taki tokotasi ki tena manavaga ola o manava mai kia tatou. Ko te mea ke maua ai se ola mo te malosia fou faopopo, aua te ola o tena fekau mo tena galuega kae koi ola tatou ite olaga taumafai tenei.

Ke manuia koutou katoa ite alofa o te Atua.

LAUGA O TE LOTU TALA 23 FONO LASI 2014 NIUTAO



Rev. Tofiga Falani

Tusi Faitau: ESEKIELU 37:1-14

Matua: *fuitau e 14* “Ka manava atu au ki a latou, o toe fakaola mai latou, kae tuku ke nofo i te lotou fenua tonu. Tena la, ka iloa ei ne latou i a au ko te Aliko. Au ne tauto me e fai ne au a te mea tenei – e fai e iloa ne au. Ko au, te Aliko, tena ne faipati atu.”

Manatu sili ote lauga: “TE ALIKI, MANAVA MAI TOU MANAVAGA OLA”

Mai i te ata o te vanu o ivi mate tela ne fakatonugina ei a te pelofeta ko Esekielu ne te Aliko te Atua, ke lavea ne ia ate Tafolaaga o ivi e uke kae ko oko e iloa ite maloo, kae ke valo atu Faka-pelofeta ki ivi maloo konei, me i te Aliko te Atua ka manava atu ne ia a tona manavaga ola, ko te mea ke toe mafai o fakaola mai a latou, kae kafai ko toe ola mai a ivi maloo konei, ko te mea ke iloa ei ne latou me i a ia kote Aliko sili mo te Aliko te lotou Atua. Mai ite fakalogo mo te talitonu kae fakatunaki o te Pelofeta ko Esekielu tela ne valo e iloa Faka-pelofeta ki ivi maloo konaa, kae ne lavea e iloa ne ia a te tonu ote fekau mo te fakatonuga ate Aliko tenei ki a ia, tena tonu a te pogai, ko a fakamuamua ai pena ate manatu maluga i te tagata ola, kae fai mo naunauga o tona loto, ko te mea ko te Aliko, ke fakatumau o manava mai a tona manavaga ola, ko te mea ke mafai o maua a te ola faka fougina mai i tona iai mo tona kau fakatasi mai.

KOTE VANU O IVI MALOO Ko a fakatusa ate vanu o ivi maloo, tela ko a seai se isi fakamoemoega me ka toe mafai o toe ola mai ei, ki te olaga fultua o te fenua o te Atua ko Isalaelu kit e Aliko te lotou Atua, e tena te auala ne fakasala ei latou ne te olotou Aliko te lotou Atua kae fakatafea ki te fenua ko Papelonía. Ite nofo o latou I Papelonía, ko a tusa eilóa a latou e pela mo ne ata o ivi maloo, ko a tafola valevale i loto o te vanu, kae ko a seai se fakamoemoega me ka toe mafai o toe ola mai. Kae fakafetai ki te Aliko te olotou Atua me e tigaa ko a seai se fakamoemoega i tino Isalaelu kae tagai la a te Aliko , te Atua alofa o Isalaelu e toka faeloa mo ana fakatokaga gali kae tafasili atu i te lelei kae to mafai ei o toe maua se fakatokaga fou kae gali mo ana tino ke toe fakafoki ki lelusalema I luta, ke toe faite fakafou ate olaga talitonu kae tapuaki o Isalaelu ki te Aliko te lotou Atua.

KOTE MANAVA MAI OTE MANAVAGA OLA OTE ALIKI KI TE MISIONA A TE EKT

E tenei a te Muna tuku moo te 23 o Fonotaga Lasi ate Ekalesia Kelisiano Tuvalu 2014 i Niutao. Ko te naunauga o loto moa gaga a takitaki o ekalesia mo kaulotu k ote mea k ote Aliko ke fakatumau o manava mai a tona manavaga ola ki luga o tena ekalesia. Se avaganoaga e sili i te maluga mo te taua, k ote EKT(faka-katoa) Kea ta toe kilokilo fakalei ki polokalame o tena misiona fakaola ki tino katoa, ko te mea ke o'oga tonu mo te mea e loto kae filigalo a ia kiei. Sea nei a te kiloga ate ekalesia ki tulaga o fakalavelave tau ki te ola lei, ki tulaga o tena maumea, tuu mo aganu, fanau ko se ava, se fakalogo ki matua, tulaga o masaki pisi kae maise a te fakamataku o te "Ebola" ko silia atu a tena fakamataku i te "Selamete", te taupulega lei, tulaga o te tali atu ki fakalavelave tau te natula. Mafulifuliga o tau o aso. E pefea o fakamoemoe o fakanaa a tatou k ote Aliko te Atua ke manava mai a tona manavaga ola ki tena ekalesia kae maise ko ana polokalame fai e agai atu ei ki fakalavelave ko a fakafeagai mo tatou i ona po nei? Ko te tali, e tena i te koe e tenei foki i te au. Kae talosaga tatou, ko te mea ko te 'Aliko te Atua, ke manava mai a tona manavaga ola' aua te ola lei mote filemu kae manuia o tena fekau mo tena galuega

Se fekau ne fakatino tonu mo tino o te Atua i te

tafeaga i Papelonía e auala i tena Pelofeta ko Esekielu. Kae se fekau foki mo tatou i te 23 Fono Lasi a te EKT(faka-katoa) I te tausaga nei 2014 i Niutao. Ko toe fakamanatu mai a te tala i te afuliga ne lesu a tino katoa kola ne fakatau atu a olotou mea i loto I te faletapu, fuli ne ia taipola a tino fuli tupe, mo nofoaga a tino fakatau tupe. Kae ne toe fakamantu ne lesu ki a latou a muna a te Pelofeta ko Isaia, me i te faletapu o te Aliko e fakaigoagina se fale talo mo tino o maloo katoa. (Isaia 56: 7) (Ilelemia 7:11) kae nei ko a fakaoga see ne latou, ke fai mo fale e sala ei a manuia o te tino eilóa ia ia .

Te Ekalesia Kelisiano Tuvalu, ke ata tonu fakalei tatou me i a lesu, ko te fakatinoga tonu eilóa tena fakanaa mote fakapalepale o tatou ki te Aliko te Atua ko te mea ke manava mai a tona manavaga ola, ke toe fakaola I ei a ivi maloo ki se ola mafuta mo kaufakatasi mo ia i te olaga nei, kae maise ko te ola e se gata mai, se gata mai eilóa.

Amene!

SUKESUKEGA O TE TUSI TAPU

Rev. Fitilau Puapua

"SE AUALA KI MUA, MAI I TE KILOGA KI A ESEKIELU 37:1 -14 & loane 20:21-23

SE PEPA NE FAKATOKA MO SUKESUKEGA O TE 23 FONONASI EKALÉSIA KELISIANO TUVALU, NIUTAO.

POGAI: Ko te toe fakamalosiga o te 23 Fono lasi a te Ekalesia Kelisiano Tuvalu ke fakatoka se auala ki mua mo te vaka Faka-Tualall a te Ekalesia mo te su a fa tausaga.

FAKATOMUAGA: Ka se lasi a te toe fakamatalatalaga o te tusi o Esekielu

1. Tulaga o te vaitaimi ne tusi ei te tusi tenei kae maise ko te autu katoatoa o te tusi a te pelofeta.
2. Ko vaevaega o te tusi tenei mo fakamafa i loto i vaega lasi o te tusi kae ko te toe kilo o tatou ki te tusi tenei Esekielu e 37, ka onono fua tatou ki te 'Auala ki mua io ko te toe kamataga fou mai i te fekau tela ne mafai o aumai ne Esekielu 37: 1-14, mo tena taua i te kiloga a te

ekalesia ki te Tala Lei a lesu Keliso pela mo te molimau a loane 20: 21-23. Io me ko te fakataunuga i a lesu Keliso mo tena galuega fakaola.

EVAGALIA IOANE 20:21-23

I te Evagalia 20:21-23 e lavea ne tatou a te tala a loane e uiga mo te ugaatuga ne lesu ona soko ke talai te Tala Lei.

Tela e pau mo te tala a Mataio 28:18-20 E isi ne mea e taua i te mau tenei a loane ke onono tatou ki ei.

1. A te tala a loane ne tupu a te mea tenei i te taimi ko toetu mai lesu i te tugamau.
2. A te faipatiga tenei a lesu ff. 21 “E pela mo te uga mai o au ne te Tamana, tela la ko uga atu foki ne au a koutou”..e aumai i se tulaga o te faipatiga mo se mea ne tupu kae e tupu eiloa io me ko te ‘Perferect tense’ ko tena uiga ko te uga mai ne Tamana a tena Tama ko lesu e fakamatala ne loane me i a lesu tenei ko oti ne mate, ko toetu mai kae fetau mo ona soko se mea ko oti ne tupu kae koi tupu eiloa.io me ko taimi tenei e faipati atu a lesu ki ona soko kae a ia koi nofo loa a ia i tena galuega tela ne uga mai a ia ne tena Tamana kae ko uga atu foki ne ia ona taugaso ke kaufakatasi mo ia i tena galuega. Ko tena uiga e seai se fakagataga i te Galuega a te Atua.

NOTE E se ko tena uiga ne uga mai a lesu ne tena Tamana, fai tena galuega ko taimi loa ne mate ei a ia i luga o te sataulo, oti atu foki eiloa mo te taua o te galuega, Ikai a te uga atu ne lesu a ona soko e fakaasi atu ne lesu me tumau te taua o tena galuega kae se galuega ne uga mai a ia ne tena Tamana kae nei ko uga atu ne ia ona Soko ke fakasoko. E tenei a te koga tela e fakavae mai ei a te auala ki mua.. o te Galuega tenei ko aumai kia tatou...Muna lesu, e pela mo te uga mai o au ne toku Tamana e pena foki eiloa o uga atu ne au a koutou. E mafai foki ne tatou o lavea i te faipatiga tenei a tou Aliko me i te galuega a te Atua io me ko auala ki mua o te galuega a te Atua, e seai se koga ke sala tatou ke kamata i ei tou olaga tavini io me sala tatou ki se koga ke fakaoti ki ei tou olaga tavini i te galuega tenei. Te fakavae o te auala ki mua o te galuega e se fakavae mai ia koe mo au io me ko tatou takitokotasi, Ikai e se fakavae te auala ki mua o te galuega a te Atua ia tatou kae e fakavae eiloa ki te Aliko ko lesu. E pela mo muna a Premen Niles..”I loto i te Galuega a te Atua e se sala ne tatou se koga ke kamata ei tou galuega io me se koga ke fakaoti ki ei tou galuega, Ikai,..me ko te koga tela e kamata ei tau galuega, ko te koga fua tena ne fakaoti atu tou taina ne mua atu i ou mua, mo te koga tela e fakaoti

ki ei tau galuega ko te koga foki tena ka kamata atu i ei tou sua taina i ou tua. Tela la te galuega e pela loa mo te uiga o muna a lesu ki ona soko Tela la e pela eiloa mo toku Tamana ne uga mai ne ia au, nei ko uga atu ne au koutou... E tonu a muna Premen Niles A te auala ki mua mo te galuega a te Atua e seai se kamataga e seai se fakaotiga kae ko te mea fua e fai ne tatou tavini a te Atua i te galuega a te Atua ke maua ne tatou a te auala ki mua, ko te gasue faeloa ki mua....MOVE FORWARD!!! Mo te fakalagolago ki te mana mo te malosi o ia tela ne uga atu ne ia a tatou. Masaua me i te taua o te muna a tou Aliko pela...” E pela mo toku tamana ne uga mai ne ia au tenei ko uga atu ne au koutou. Se mea ko oti ne tupu ko oti ne uga mai a ia...ko oti ne fai ne ia te galuegako oti a ia ne mate kae tenei ko toetu kae ko te taua o te galuega tenei eiloa e tumau tela e fakaasi i te toe uga atu ne ia ona soko.

3. 2. I te fuaiupu 22 I kona ne manava atu a ia ki luga ia latou kae ne fai atu “ke maua ne koutou a te Agaga Tapu “ A te manava atu tenei o te Agaga Tapu e masani eiloa o toe fakaasi mai a te ata o te Kenese 2: 7 “Ne puke ake ne te Aliko te Atua ne mu kele mai i te laukele kae faite ne ia ki ei a te tagata, ne manava atu a ia ki ona puisu, tela ola ei a te tagata” mo te Esekielu 37 9-10. “Muna te Atua ki a au, Te tagata tela e oko ki ei a te mate, valo fakapelofeta atu ki te matagi. Fai ki te matagi me i te Aliko Sili e faakatonu ne ia a ia ke vau mai i feitu katoa, ke manava ki loto i foitino mate kona, kae toe fakaola mai a latou. Tena ne valo fakapelofeta eiloa a au e pela eiloa mo te fakatonuga ne fai mai ki au. Ne ulu atu a te manava ki loto i foitino kona tena ne ola i ei, ko te mea eiloa ko tu ki luga.”
4. Kafai a te folafolaga tenei a lesu ki ona soko, “ke ia koutou a te Agaga Tapu” e lavea ne tatou pela me ko te aumaiga o te agaga tela e aumai ne ia a te ola (Life giving spirit mo te agaga e aumai ne ia a

te fakamalosiga, ko tena uiga a te pogai taua tela ne manava atu ne Iesu kia latou a te manava ola e pela mo te Kenese mo te Esekielu ko te manavatuga o te ola io me ko te avatuga o te agaga ola. Ko te faipatiga tela e fakasino mo te Agaga Tapu ko tena uiga ko te Agaga Tapu tenei o te Atua ko avatu ne Iesu mo te fakamalosiga o te galuega a te kau soko.

5. E taua ke lavea ne tatou a te tulaga faigata tenei ko fakafeagai mo te kau soko. A. Ko te lokaloka olotou mataloa, ona ko matakū i te kau lutaia. (ff19 “Ko tai leva e iloa a te afiafi o te Aso Tapu kae ko te kau soko ne fakapotopoto mai i tua o mataloa kola ko oti ne loka ona ko latou ne matakū i te kau pule lutaia.” E. Ko mate te olotou Fakaola I Ko oti ne fakafiti kae fakalata ne latou te Alikī. I te manavaga fakaoti o te ff. 19 “I kona ko Iesu e iloa ko vau kae ne tu atu i loto o latou ana muna, ‘Ke ia koutou a te filemu’.

1. Ko tena uiga ke toka outou loto me ko ia e iloa tenei. Sa matakū. Masaua me lokaloka olotou mataloa ko te fakaasiga o te polepole mo te manavase. E fakaasi mai i konei ne te tusitala ko loane, me i te auāla ki mua mo te galuega a te kau soko konei ka uga atu ne Iesu e fakavae mai i te fekau o te filemu. Ko te olo atu mo te fekau “Ke ia koutou a te filemu io me i te auāla fano ki mua mo te galuega a te Atua e manakogina ke i ai fakatasi a te filemu o te Atua i te auāla ki mua. Lua a te galuega tenei ka uga atu ne Iesu ke fai ne latou e se manakogina te matakū mo te falotoloto lua. Ko te ata o te lokaloka o mataloa i te kiloga a loane ko te ata o te sataulo mo te mate.

A te kau soko ko pela e iloa mo ivi malo kola ko mate te olotou fakamoemoega. Setioa o faipati a loane i te tusi o fakaasiga Muna Iesu au e tu i te mataloa kae Tukituki atu, so se tino e tala mai ne ia a te mataloa ki au, au ka fanatu ki loto ke mafuta fakatasi maua. E taua i te auāla tenei ko toe uga atu ne Iesu a koe mo au ke TALA TOU MATALOA KE ULU ATU A IESU Kae e se gata i ei, e iloa lei e iloa ne Iesu olotou vaivaiga. E iloa ne Iesu me i a ia ne fakafiti ne latou. Muna Petelu “Te fafine, e se iloa e iloa ne au a ia. E se iloa ne au a te mea tena e fai mai koe ki ei. E iloa foki ne Iesu i a ia ne fakalatala ne latou. Muna luta te Isikaliota,” Ko te tino e iloa tela e sogi au ki ei puke me ko ia tena. Ne fanatu luta i mua e iloa o Iesu mea e iloa ko sogi atu ki a ia. Se a te tali a te Alikī, “

luta e a e fakalata ne koe a te tama a tagata ki se sogi? E iloa katoa ne Iesu tou vaivaiga i loto e iloa i tou vaivaiga kona muna Iesu “KE IA KOUTOU A TE FILEMU..Ko tena uiga sa fakavaivai me koi fakatuagagina e iloa ne au a koutou. A ia ne fakalata ne latou kae ke masaua ne latou me koi fakatuagagina e iloa latou ne Iesu, mo te Galuega. E manakogina te auāla ki mua mo te Galuega tenei ko uga latou o fai ke fai mo te loto toka. Kae ko te loto e toka fua manafai e iloa ne latou me e tu Iesu i loto o latou o tu mo latou. Te filemu o Iesu ko te vaega filemu tela e iloa ne koe i te Atua e ola fakatasi mo koe. T Atua e tu i loto i ou vaivaiga mo oku vaivaiga. E se gata i ei, i konei a te fekau a loane e manino me e se fua ke iloa ne tatou a Iesu io me ko te Atua e kaufakatasi mo tatou kae ke iloa foki ne tatou me pefea tou vaivaiga i te Galuega kae e fakatuagagina faeloa tatou ne Iesu ke fai a tena Galuega.

6. Ko te faipatiga tela e fakasino ki te fakamagaloga o agasala i te ff. 23 “Kafai e fakamagaloga ne koutou a agasala a tino, a latou ko fakamagaloga, kafai e se fakamagaloga ne koutou a latou a latou e se fakamagaloga.” Ko tena uiga, e tasi tenei o auga taua io me ko te auāla ki mua o te galuega tela e tau o folafola atu ne latou io me fakatino ne latou.

E manakogina te olaga fakatau fakamagaloga i te galuega. Te olaga fakamagaloga se vaega taua o se toe kamataga fou. Se fakaasiga o te mafutaga kaufakatasi. Kafai se mafutaga e maopopo kae kaufakatasi se Ekalesia io me se fenua e malosi. Kafai e seai se olaga fakamagaloga e seai se auāla ki mua io me se kamataga fou. Kafai seai se auāla ki mua io me se kamataga fou seai se maopopo mo te mea ka tupu ko te mavaevae mo te vaivai o te galuega.

KO TE TAUA O TE ESEKIELU 37:1-14 MO NIISI MATAUPU O ESEKIELU KI A IESU I TE MOLIMAU A IOANE. A te Evagalia a loane e fakasi mai ne ia me i a Iesu e lasi o fakataua ne ia a kiloga a te pelofeta ko Esekielu. Muamua e lavea ne tatou a te loane 20:20-23 e fakasino tonu e iloa ki luga i te kau soko o Iesu tela i nisi taimi e fakauiga kia latou a Isalaelu, io me ko te 12 matakaiga o Isalaelu io me ko Isalaelu ko toe

fakaolagina (Restored Israel). I te Esekielu 37: 11 “Muna te Atua ki au, te tagata tela e oko ki ei a te mate, a tino Isalaelu e penei mo ivi konei.” I te ff. 12 ko fakaasi manino mai ne te pelofeta ko Esekielu, me ko seai se fakamoemoega o latou. A latou ne tino ko leva ne mate tela a olotou ivi ko malo. Kae i te ff. 10 “Tena ne valo fakapelofeta e iloa au e pela mo te fakatonuga ne fai mai ki au. Ne ulu atu a te manava i foitino kona, tena ne ola i ei ko te mea e iloa ko tu ki luga. A te tokouke o latou e lava e iloa se kautau” E fakaasi mai loto i fuaiupu konei i te kiloga a loane, a te kau soko ko te kautau tela ka fakataunu ne latou te folafolaga o te toe uga atu. (The great commission)

Lua,(Ko te lua o mea taua mai i niisi mataupu o te tusi o Esekielu kola e fakasino ki a lesu i te kiloga a loane, Ko te fekau e uiga mo te Tausi mamoe lei tela e maua ne tatou ia loane 10. E aumai mai i a lelemia23:1-6 kae ne fakalauefa ne Esekielu 34, Tolu, A te fanaufougina tela e maua i te tala o Nikotemo e pau mo te Esekielu 36: 25-27 Fa, Ko niisi kiloga ki te Esekielu 34 23-24 mo te 37:24-25 te mesia ko fakaasi mai te Mesia ko Tavita.

7. E lavea foki ne tatou i a lesu e lasi tena ai a ki te mataupu e uiga mo te toe fakafokiga o Isalaelu ki te olotou tulaga ko te fenua o te Atua. (restoration of Israel) tela ko te mataupu taua i te mataupu e 34-37 o Esekielu. A te fakailoga o te fuli ne lesu a te vai ki te uaina ko te fakailoga o te fakafouga o te olaga tapuaki. (loane 2:6-11) A te folafolaga a lesu e uiga mo te Malumalu fou (loane 2 19-21) Ko te fakataua ne ia a te manakoga mo te fanaufougina. (loane 3:3-6) Ko te tapuakiga i te agaga ko sui ne ia a te tapuakiga tela e fakatumau i se koga e tasi (loane 4: 20-24) A ia ko te Mamoe o te Paseka (loane 19:36)

Mai i ata fakaasi konei e mafai ne tatou o fai aka pela me i a lesu mo loane e isi e iloa ne la manakoga fakapitoa i mataupu konei. Kae maise ko te toe kilo o laua ki te Feagaiga Mua. Ko tena uiga a kiloga ki te Esekielu 37: io me ko te mataupu 34-37 pela me taua ki te galuega a lesu, kae maise mo te uga atu ne ia ona soko e lasi kii te fesokotaki mo te fekau o te toe kamataga fou io me ko te auala ki mua o te fenua o te Atua i te kiloga a lesu.

KO TE FAKATAUNUGA O TE ESEKIELU 34-37. (A mataupu konei o Esekielu e lasi o faipati ki te fakaolataga o Isalaelu, kae e akoako mai a te toe fakafokiga o te fenua o te Atua. Muamua. A te Mesia

tela e vau mai i te gafa o Tavita ka fai a ia mo tupu/Tausi mamoe i luga o Isalaelu tela ko toe fakafokigina. Tela e maua ei a matakaiga e 12 o Isalaelu ka maopoopo fakatasi kae ko fakafougina olotou loto kae ka fakamanuiagina i te olotou fenua ke tavae ne latou a te Atua.

KO TE AGAAGA TELA E AUMAI NE IA A TE OLA FOU. Kafai e aumai ne tatou a loane 20:22 ke faka fesokotaki mo te Esekielu 37: 9-10 e maua i ei ne tatou a te manava atu ne lesu a te manava ola ki ona soko e fakaasi mai ei me ia latou ko te Isalaelu fou tela ko toe fakatu mai ki te ola fou e pela me se kautau malosi a te Atua, ke fakataunu a te galuega o te toe uga atu. E se ko tena uiga ke toe fanaufougina a latou Ikai, ona me ko oti ne toe fanaufougina a latou i te toetu mai o Keliso mai i te mate kae ko te uiga o te muna a lesu “Ke ia koutou a te Agaga Tapu,” e fakasino kia latou ko te Isalaelu ko toe fakaola mai. A te galuega a te Atua ki te toe fakaolaga o Isalaelu ko oti ne kamata kae ko te kau aposetolo ko te togaloto (Center) o te galuega tenei.

KO TE AGAAGA O TE ATUA TELA E AUMAI NE IA TE FAKAMALOSIGA. A te fakamalosiga o te kau soko se mea e iloa e tau o fai. Kafai e tonu a taugasoa o lesu kola e muni mai tua o mataloa loka ko te kautau a te Atua, e taua la mo latou ke toe fakamalosigina. A te maua ne latou a te Agaga Tapu ko tena uiga ko nofo a latou i loto i te fakaotiotiga o te galuega fakaola a lesu. I te manatu la o loane, a latou kola ko maua ne latou a te Agaga Tapu manafai e oti a lesu ne fakaekegina, ka iloa ne latou me i te vai o te ola e tafe mai i a ia. A te fakamalosiga mo te auala ki mua e maua fua i te vai tenei o te ola ko lesu.

FESILI

1. NE A A IVI MALO KONEI KOI LAVEA EILOA NE TATOU I TE TOU EKALESIA I TE VAITAU TENEI?
2. NE A AUALA E MAFAI NE TATOU O MANAVA ATU TE MANAVA OLA O TE ATUA KE TOE FAKAOLA AKA A IVI KONA?
3. NE A OUTOU FAKAMOEMOEGA KI TAPULA LEI KOLA E TAU O FAKATAUA NE TE 23 FONOLASI I NIUTAO NEI KOLA E TAU O

MAUA NE TATOU IO ME KE OKO TATOU KI EI I
TE 24 TONO LASI I VAITUPU?

FAKAFEAGAI MO NIISI TALITONUGA

Rev. Fitilau Puapua

E toe fakatalofa atu ki taugasoā faitau Lama mo te Lama o te vaimasina tenei. Fakafetai ki te Alofa o te Atua ko oti atu a faiga Fonotaga tela ko te 23 Fonolasi a te Ekalesia Kelisiano Tuvalu i Niutao. E avatu foki a te fakafetai mo te fakamalo lasi mo Niutao mai i te Malu o tena Fuafatu mo tena kau filifili, te Ulu-kaupule mo tena kaiga kaupule ke oko atu ki te Sina o Niutao kae maise ko ana kaiga katoa ke oko atu e iloa ki fanau. E lavea ne te Aliko te tusaga lasi ko oti ne fai ne koulua mo tena Fekau mo tena Galuega. Ke fakamanuia ne te Atua oulua tautiga loto alofa kae foaki mo tena Ekalesia, Fakafetai.

Ko te toe fakasokoga tenei o te mataupu mai i te lama i te lua 2014, tela ko te Lama o Luni 2014.

I te lomiga tenei o te Lama, koi sausauala e iloa tatou ki auala kola e mafai ne tatou o fakafesagai a te talitonuga tenei ko te Lotu Mamona. Ko oti ne iloa ne tatou i tou mataupu kola ko teka e uiga mo te talitonuga tenei, e se se talitonuga Kelisiano.

Te talitonuga Mamona tela ne fakamafua ake ne te tagata tenei ko Iosefa Simati fakatasi mo tino kola ne fakaolaola ne latou a te Lotu tenei, e se se talitonuga Kelisiano, ona ko te Kiloga a latou kia lesu tela i te olotou talaiga, a lesu se tagata agasala, ona ko te uke o ana avaga. E pena foki o se talia ne latou a te Atua tenei e talitonu tatou ki ei mo tena fakaasi mai i auala e tolu tela ko ia ko te Atua Te Tamana, Te Tama mo te Agaga Tapu. I olotou manatu, a te Atua se tagata tela ne avau mai i te su a paneta, kae ne ola ake a ia mo tino i te paneta tenei.

Ko auala kola e fakamataku ei a te Lotu tenei muamua, ona ko olotou talaiga e masani e iloa o fakamatala ne latou te olotou lotu se talitonuga Kelisiano me ia latou e talitonu kia lesu, kae ko te tonuga a latou e se talitonu ia lesu ko tama a te Atua, kae kia latou, a lesu ko te taina

faka-teagaga o satani. E fakamataku foki a te Lotu tenei, ona ko te uke olotou maumea i koloa faka te lalolagi tela e mafai o faka segina ei tatou kae maise e iloa ko olotou talaiga e uiga mo lesu mai i te uke o misionale a latou.

Ko fakasoko atu mai lalo nei ko talitonuga io me ko faifaiga a te Lotu tenei ko te Mamona kola e se masani o sausauala ki ei olotou misionale manafai e olo atu o talai.

7. E se mafai o fakaasi atu ne latou olotou faifaiga funa kola e masani o fai ne latou i loto i te olotou Malumalu. Kae i te tausaga e 1990 i te masina o Apelila ne fakailoa ne latou me i faifeau kelisiano ne tino faigaluega a satani, kae e se mafai foki e iloa ne latou o fakaasi atu me i pale tivae) Sacred underwear) kola e pei ne latou i te olotou talitonuga e puipui ne ia latou mai fakaosoosoga.

8. E se mafai foki ne latou o fakailoa atu me i olotou takitaki io me ko takitaki o te Mamona ne akoako ne latou ia lesu Keliso ne fanau mai i auala o feusuakiga i te vasia o Malia mo te Atua. E fanau mai pefea a tamaliki? Taku tali, e pela e iloa mo lesu ne fanau mai i tena tamana, ko te kesega i te vasia o lesu mo niisi tino ola e tenei, a tou tamana i te foitino ne tino ola penei mo tatou tagata ola kola e oko ki ei a te mate, kae ko te tamana o lesu Keliso i te foitino ko te Atua o te lagi. (Iosefa Simati) Home evening Manual, 1972 pg 125

9. E se mafai foki ne latou o fakaasi atu me ia latou e talitonu i te Tusi Tapu tela ko te muna Ola a te Atua ko oti ne fakamaseigina i senitenali ko teka, tela la ko se tau mo tatou o talitonu katoatoa ki te Tusi Tapu. Au e talitonu i te Tusi Tapu tela ne vau e iloa i lima o latou kola ne tusi ne latou kae ko tino kola ne toe fuli ne latou ne fai ne latou e uke a mea se ki loto. Iosefa Simati, pg 327...kae ko te Tusi Tapu ko oti ne kaisoagina a te mea tonu i ei, e uke a tusitusiga ko galo, ko niisi tusi ko se talia ne te lotu Pope. Ko nai tusi fua konei e toe ko uke a fulifuliga ki ei ko ala i ei o fakamaseigina. (Orson Pratt, The Seer pg 213)

10. E se mafai foki o fakaasi atu ne latou me i te Tusi o Mamona mo Tusi o akoakoga mo Feagaiga kola e fai latou me sao kae tonu e se mafai o se e

fetenaki e iloa latou ia latou e iloa i taimi e uke.

I te Tusi o Mamona e fai i te Atua ne fakase ne ia a uiga fai avaga tokouke o Tavita mo Solomona kae i loto i Tusi o akoakoga/doctrines mo Covenants ko takufakasaogina laua.

11. E se mafai foki ne latou o fakaasi atu me e masani o fakaoga ne latou a muna e fakaoga i talitonuga fakakelisiano o fakamatala ki talitonuga faka-Mamona. E pela mo muna penei toe fanaufou- Mo Mamona e fakauiga ne latou e pela me se process io me se faifaiga tela e kamata mai i te papatisoga ki te vai. Mo Kelisiano te toe fanau fou ko te talia katoatoa ne koe a te Aliko ko Iesu Keliso. Ko te muna Fakaolataga mo te fakaekegina(Salvation & Exaltation Ne muna e fakamatala ei a te fakaolagina o tatou e auala it ou talitonu kae fakatuanaki ki a Iesu. E fakaekegina tatou ki tena malu fakatupu pela me se tau i o te olaga talitonu kae talia a Iesu e masani o olo fakatasi a muna konei mo te mealofa ko te ola e segata mai. Mo Mamona a te Fakaolataga ko te toe tu mai katoa o tino ma ii te mate. Ko te fakaeke ki luga ko te tau i o te ola tautali ki tulafono fakamamona mo te ola e segata mai ko te fai o koe mo atua i te lagi sautua tolu. Kelisiano e se talitonu kit e fai tatou mo atua ikai, a tatou ko te kautapu kola ka mafuta fakatasi mo te Atua tonu.

E pau a pati kae e kese mao a tou fakaogaaga. Ona ko muna konei ne mafua aka i talitonuga kelisiano kae ko fano a Iosefa Simati ko fakaoga mai neia ki tena malamalama faka tagata tena ko kesekese ei a fakauigaaga. Ke moa fua koe e fakase pela ,io tou olo kit e Lotu Mamona me e pau e iloa mo tou lotu e talitonu kia Iesu e isi se fanaufou mo te papatisoga, e isi se olasegata mai mo te fakaola taga. Ikai onoono tonu me it e fakaolataga tena e maua fua ne koe mana talitonu koe kia Iosefa Simati. E pena foki tulafono faka-Mamona. A te Ola e segata mai ko te fai o koe mo atua...ikai e se tena talitonuga faka-Kelisiano. A te ola e segata ko te mealofa faitauanoa a tou Aliko ko Iesu Keliso ke mafuta fakatasi tatou ia pena foki mo te kautapu i tena malo segata mai.

12. E se mafai ne latou o fakailoa atu me ko te mea ke ulufale atu koe ki te lagi maluga o te kau Mamona(Celestial heaven), e tau mo koe o talia Iosefa Simati Jr pela me se pelofeta. Ko te talitonu fua o koe

kia Iesu e iloa aunoa mo Iosefa Simati ka faimalo ne ia koe ke ola fua koe i lagi ki lalo io me ko lagi malalo ki te segata mai. I pati a toko sefulu o Pelesitene o te Lotu Mamona, me e seai se fakaolataga e maua ne koe e aunoa mo talitonu kia Iosefa Simati. Ko te fakaolataga tenei ko te fai koe mo atua it e toe lagi maluga.

13. E se mafai foki ne latou o fakaasi me i te tino ne fakatu ne ia te olotou lotu tela ko te Lotu Mamona ne fai ne ia e uke a pelofetaga se.

E pela mo te valoaga ne fai ne ia me ia Iesu Keliso ka vau i loto it e 56 tausaga tela ko te tausaga e 1891 io me koi tuai faeloa 1891 kae ne seki ai e iloa se mea pena ne tupu. Ne iloa katoa ne tino a pelo o Iosefa Simati it e fai ia ia se pelofeta tonu ma ii te Atua. Ne fakasalalau foki ne ia me e isi se fakasiga kia ia me ka faite i ona vaitaimi a te Malumalu Tapu o te Atua it e sitete o Missouri Kae tela la ne oko atu taimi kona e seki ai e iloa se laukele patino mo te lotu Mamona i vaitaimi kona kae seki ai foki se Malumalu. Ne iloa ake ne tino tokouke me ia ia tenei mo tena Lotu tenei se tino e poto i te fakase tino.

Mo taua taugasoa faitau lama, kona tusaga ne taumafai o faka maina atu ko te mea ke mafai ne tatou o fakafesagai a tino io me ko misionale o te lotu tenei konei ko malaku i tou atufenua. Ko te mea taua ke mo a tatou e vave fakase manafai e fakamatalatala atu ne latou te olotou talitonuga kae ke nofo malamalama tatou me kona auala e masani o aumai kia tatou mo olotou fakamatalaga ke fai aka tatou pela me kaati la e lei te lotu tenei me se lotu kelisiano. Fakamolemole toe faitau kae toe faitau ki fakamainaga kona ne avatu ne au kae maise ko akoakoga me ko talitonuga tonu e iloa a latou kola e se masani o talai atu i taimi muamua e faka masani atu ei ki tou kaiga. Ko te fakamoemoega mo aku talosaga ke fakamautakitaki ne te Atua te tou talitonu kae fakatuanaki ki te Tala lei a tena Tama ko Iesu Keliso kae ke manuia koulua i te alofa o tou Aliko. Mo te su a lomiga o te lama ka onoono tatou ki auala kola e mafai ne tatou o fakafesagai te talitonuga MOLIMAU A IEOVA.

KE MANUIA KOULUA I TE ALOFA O TOU ALIKI!

Mataupu Silisili

Te Fatele – Fatele Theology : *Usu se fatele fou ki te Alik i suiga o tau o aso*

Maina Talia

Talofa taugasoā faitau lama i te kuata tenei. I loto i taku taumafaiga tenei, ka taumafai au o faipati ki te mataupu silisili i ona vaega kesekese, kae ka fakapitoa loa taku faipatiga ki luga i te Mataupu Silisili o te taimi nei (Contextual Theology), kafai e se oti aku fakamatalaga i te laupepa tenei, ka taumafai au o fakaoti atu i te su a lama. Ka kilo koulua ki te ulu o taku faipatiga (Te Fatele – Fatele Theology: Usu se fatele fou ki te Alik i suiga o tau o aso) ka lavea ne koulua me ia au e taumafai o faipati ki tulaga o te olaga masani o Tuvalu, i ana tuu mo ana faifaiga masani. I loto i te Mataupu Silisili tenei, e fakaoga ne au te “fatele” i se kiloga faka-mataupu Silisili, e fakafesili ei ne tatou, te tulaga o te mafai ne te fatele o fakamatala (address) a te fakalavelave tenei e fakafeagai mo tatou ki te suiga o tau o aso, mo te tai fanake. Ka mua atu au i te fakamatalaga o te pati Mataupu Silisili, (Theology) oti ko kilo malie au ki te vauga o te Mataupu Silisili, mo te taimi ne mafua mai ei te mea e taku ko te Mataupu Silisili o te Taimi nei (Contextual Theology).

Te Mataupu Silisili (Theology)

A te pati tenei Mataupu Silisili (Theology) e vau mai i te pati Eleni tenei (Theos – God) mo te pati Latina (logia-study). I tona uiga i tona kamataga, te Mataupu Silisili (theology) ko te taulotogo o te Atua. I te taimi o te 17 Senituli, tela ko te vaitau o te atamai mo te potu fakasaienisi, ne toe nofo mafaufau ei tamana o te ekalesia (Early Church Fathers), me ailoga e tonu te fakamatalaga tenei, me i te Mataupu Silisili ko te taulotoga o Atua. E nofo a tamana konei mo te talitonuga, me seai se tino ola e mafai ne ia o sukesuke io me tauloto ne ia te Atua. Ona ko manatu taua konei, ne olo aka ei a fakamatalaga (definitions) o te Mataupu Silisili e uke.

Mai te uke o fakamatalaga, e lua loa o fakamatalaga (definitions) e fiafia au, kae talitonu foki au e faigofie o talia kae malamalama tatou i ei, ko te fakamatalaga a Saint

Anselm e fai penei “Understading Seeking Faith or Faith Seeking Understanding” – “Malamalama ke maua te fakatuanaki io me Fakatuanaki ke maua te Malamalama.” Tona uiga te Mataupu Silisili, e fai ne koe e ala i te fakatuanaki, ko te mea ke malamalama koe i te Atua tela e se lavea ne tatou. I pati a MP Joseph i te fakatomuga o te tusi a Po Ho Huang “From Galilee to Tainan” i ana muna me seai se mea e taku ko te Mataupu Silisili mafai seai se Mataupu Silisili o te taimi nei (Contextual Theology), so se Mataupu Silisili ne fai, se Mataupu Silisili o te taimi nei.

Mataupu Silisili o te Taimi nei (Contextual Theology)

Professor Shoki Coe ne pule i te akoga fakafaifeau ne akoga ei au i Taiwan, kae e takutakua te tagata tenei, me ko ia te tino muamua i te lalolagi, ne fanaka mo te fakamatalaga io me ko te Mataupu Silisili e taku ko te, Contextual Theology (or Contextualization of theology) io me ko te Mataupu Silisili o te taimi nei. I taimi konei o Shoki Coe, e lasi kii te faipatigina ki faitega o Mataupu Silisili fakafenua/fakatino o fenua/ fakalatou – e taku ko te “Indigenization” masaua ne tatou i te vaitau tenei i te 70’s a fenua konei e taku ko fenua Atiake (Third World Countries) ko nofo tonu loa i te galoto o te taumafaiga ke isi ne olotou iloga (identity) ona ko te tulaga o te ola fakapologa o latou mai lalo o nisi fenua (Colonizer). Muna Coe, a mea katoa konei e aoga ki te faitega o te Mataupu Silisili o te taimi nei, ona me seai se Mataupu Silisili e faite fua (out of nothing), so se Mataupu Silisili ne fakafua ona me isi ne mea e tupu i te olaga, kae fakasilisili ei te kiloga (perspective) agai ki te lumanai.

Ona ko te faitu tena, muna Stephen B. Bervans; “te Mataupu Silisili o te taimi nei, e taua ke onoono tatou ki te Tusi Tapu, tu mo faifaiga a tatou, suiga fou o te olaga, mataupu ki te fai meatonu maise ei te ola saoloto o tino.” Konei a mea taua kola e fai mai a Bevens e tau o fakaaofia i te faitega o Mataupu Silisili o tatou mo te taimi nei. I luga i kiloga kesekese konei ne avatu ne au, e fai mai a toku faiakoga ko C.S Song, me i so se Mataupu Silisili e fai, e tau loa o faite sau kiloga

(perspective). Mo C.S. Song, e fakaoga ne ia te kiloga e taku ko te “Third Eye” tena ne faite foki loa ei tena tusi “Third Eye Theology.” Tona uiga, a ia e kilo mai i mata o te tino tela e ola i fenua Atiake (third world countries) – kola e lasi te soona fai olaga o latou ne tino pulepule i loto i lotu, faiga malo, kamupane mo nisi o fakapotopotoga lasi.

Muna MP Joseph, i te Mataupu Silisili i te vauga mai te kamataga, e lasi ke faipatigina, tusigina, sautalagina, laugagina ne tino maluga kae fai tofiga, tela e foliga mai e se poko lei ki te kano loto o te Mataupu Silisili – ko te Atua mo tena fakaolataga ki te lalolagi e ala ia Iesu. I ana pati, te Mataupu Silisili o te Taimi nei, e fakapitoa loa tena faipatiga mo tena kiloga, mai i te kiloga o mata o tino fakalofa, tino malalo, tino mativa, tino kola e se taulia i muna fai a fakapotopotoga. E fano pena te kiloga o te mataupu silisili o te taimi nei.

E seai se fakamoemoega o te Mataupu Silisili o fakapau ne tatou te Atua ki tou tuu mo tou faifaiga io me ko mea kola e masani ki ei te olaga o tatou. Te tino muamua ne fanaka mo te mafauauga tenei, tela ne taku ei a ia ko te tamana o te Mataupu Silisili a te Pasefika ko Dr. Amanaki Havea, se Tonga, kae ne faiakoga i PTC, Suva. E lauiloa te tamana tenei i te mataupu silisili e taku ko te “Coconut Theology” (Mataupu Silisili o te Niu), ko Dr. Ilaitia Tuwere ne fanaka foki mo te mataupu silisili e taku ko te “Vanua Theology” (Mataupu Silisili o te fenua). Rev. Tofiga Falani (Umu Theology), Rev. Paneta Maibuca te mataupu silisili o te pakau (Theology of the Pakau), Rev. Ioane Peleti te mataupu silisili o te ola salalau o fanau Tuvalu mai i te kiloga o te Taume (Theology of Taume and Diaspora) E uke aka foki niisi o tamana mo matua o te Pasefika kooti ne mua i malae o taumafai o fakamatala te Atua, i se gana faigofie, mo ne ata foki faigofie, e malamalama ei tatou i te Atua, tela e ola fakatasi mo tatou i taimi o te faigofie mo te faigata.

Fatele Theology

E seai la se fakamoemoega o te faitega o te Mataupu Silisili o te Fatele (Fatele Theology) o taumafai o fakapau (compare) io me iloilo/tuku fakafeagai (contrast) ne tatou a te Atua. Te Fatele Theology, se taumafai o aumai ne tatou a te fakamoemoega (HOPE) fou kae ola o tatou i te Atua i loto i te taimi e usu kae saka fiafia ei tatou ki te Atua. E tenei te fakamoemoga, tela ka kilo foki

tatou kia Prof. James Cone – i te Mataupu Silisili o te kau uli (Black Theology) mo Gustavo Gutierrez (Liberation Theology – Mataupu Silisili o te Saolotoga) laua e taumafai fua o fakamatala ne laua te Atua i se auala tela e pitosili i te faigofie, o malamalama ei a tino Uli mo tino kola e pologa i faiga ‘se alofa, kae soona fai a tino maluga io me ko tino pulepule kia latou. E seai se fakamoemoega ko te mea ke aumai ne latou te Atua o fakapau ki tuu mo faifaiga a latou, ikai.

Ka kilo taua ki te Mataupu Silisili o te Fatele, e se tena foki tena fakamoemoega, o aumai ne ia te Atua o faka saka i te fatele io me usu te Atua i te fatele, ikai. Te fakamoemoega, ko te mea ke fakaoga te fatele, e aumai ei se fekau taua, fekau e faite ei ne ia te ola galue fakatasi, te ola faifai mea fakatasi, te ola fou mo te fakamoemoega fou ia Keliso Iesu. Fatele e fakaoga e usu mai ei se fekau taua, ke mafai ei ne tatou o fakaataata te Atua e ola fakatasi mo tatou, te Atua e fiafia o milo fakatasi mo tino Tuvalu. Aumai ne te Fatele se Atua tela e pili mai, se Atua tela onomea tona fakaasi mai e ala i fekau o Fatele. Ka kilo taua ki te fatele, e seai se fakamoemoega o laua kola e fatu ne aua a fatele, o usu io me fatu ne kupu kola, e ofa ei te nofo lei o tino Tuvalu. A kupu mo lagi o Fatele, e aumai ne ia te loto malosia, se fakamalosiga, ki tupulaga, ki fenua, ki fakapotopotoga, ki ekalesia, ki tino takitokotasi, tino kola ko seai ne olotou loto fenua, tino kola ko se fia kau i fenua, e aumai ne fatele konei, a fekau e mafai ei o sui te loto makeke o te tagata, kae foki o tautua tena fenua. Ea e se tenei te natula o te Atua, te Atua tela ne kalaga ne ia a Isalaelu ke fai mo ona fenua, e se tenei te ata o te Atua tela e tautua fenua, e tautua lotu, e se tenei te Atua tela ne manuia ei Tuvalu i te fia o afe o tausaga ko teka.

Te kano loto o te Mataupu Silisili o te Fatele, ko te taumafaiga fua o fakaoga a fekau kola ne fatugina ne tou tuua pela me ne fekau ola (living text). I aku pati, me i muna o fatele ko Muna Tapu o Tuvalu, kola e manakogina ke fakamatala (interpret) ne tatou i se kiloga tela e mafai ne tatou o maua katoatoa te fakaasi mai o te Atua ki te tagata Tuvalu. A Fatele a tatou, e se fai pela e nofonofo te tino mea loa ko fatu mai tena fatele, ikai. A fatuga konei, e

fatu mai i mea ne tupu o te taimi tonu loa o te fatu fatele, e fakaasi ei tona loto ko momo, kae taumafai a ia o sala se fekau tela e moli au ne ia ki tino o tena ituala, tena fenua tona Atufenua, aua se fakamoemoega mo te ataeao. E se taumate, e penei foki a tusitusiga o te Tusi Tapu, e tusi mai ne tino lutaia konei, a mea ne tupu i olotou olaga, mo te manatu maluga ei, me ne fakaasi mai pefea te Atua mo tona alofa kia latou i te taimi tena. Tela la e tau mo tatou o fakamalosi, o kilo ki fatele mo fatuga a tatou tino Tuvalu, me ne pefea o fakaasi mai te Atua ki tou tuua i olotou vai taimi ke oko mai kia tatou i ona aso nei. I te sua lama ka taumafai tatou o kilo ki te fakaogaaga o te Fatele e fakamatala (address) ei ne ia a fakalavelave mo pokotiaga o te olaga tenei e ola ei tatou. **Toe fakasoko atu i te sua lama.....**

MO KAUVAKA

Rev. Fuiono Piita

Tusi Faitau: Mataio 14: 22- 33.

Matua: v.31 “A tou fakatuanaki ko oko eiloa ite foliki, Aia ne fakalotolotolua ei koe ?”

ULU: KE MOA KOE E FAKALOTOLOTOLUA.

Ate fakalotolotolua I aso nei, k o taku mese masaki pisi, ako fai foki mo fakalavelave ki olaga o tatou. Te fakalotolotolua e fakavaivai foki neia tou olaga talitonu kite Aliko, kae fai neia ko tatou ke ola faeloa ise a olaga manavase, matakū, tela e seai se filemu e maua mai ei.

I nisi taimi ate fakalotolotolua, ese pokotia iei tou olaga manafai e talitonu tatou kite muna ate Aliko, mo ana akoakoga, ako tatou e pokotia fua manafai ko fakagalue io me ko fakatino ne tatou ki faiga, Kae maise manafai ko fepakipaki tou olaga mo fakalavelave mo faigataga ote olaga nei, e pela eiloa mote tala a Mataio.

E tenei a te tulaga ne oko kiei ate kau soko, Ne pokotia ei latou nete masaki pisi tenei kote fakalotolotolua. E lavea ikonei ate vaivai ote kausoko, e ui eiloa ite uke o tausaga ne ola tasi ei latou mo Iesu, kae ne tumau eiloa te fakavaivai mote se tumau ote lotou fakatuanaki kite Aliko.

Kae ui eiloa te tulaga vaivai ne oko latou kiei, ako latou ne alofagina faeloa nete Aliko, ona ko pokotiaga ote olaga ko fakafeagai mo latou.

Fai mai te matua ote taeao tenei, AIA NE FAKALOTOLOTOLUA EI KOE ? Te fesili a Iesu tenei e aumai neia se fakamalosi, ko tatou ke moa e fakalotolotolua, manafai ko fetau tatou mo fuifaiga ote olaga nei, aua tatou e malaga fakatasi faeloa mo la, kae toka foki o fesoasoani mai kia tatou.

MANATU MUAMUA: Ate fakalotolotolua e oko mai, manafai ko talia ne tatou a fakalavelave ke pule io tou olaga.

E tenei tonu te tulaga ne oko kiei ate soko o Iesu ko Petelu. Fai mai te tala mene lavea ne Iesu ate fakalavelave ko oko kite poti ote kausoko, ko logofiofio eiloa ne tuki ne peau ona kote malosio ote matagi

Ne sasale atu ei a Iesu kia latou ite vaveao iluga ite tai, ne pakalaga ei latou mote matakū, I kona foki loa, faipati atu ei a Iesu kia latou, ana muna- KE LOTO MALOSIO KOUTOU, SA MATAKU ME KO AU EILOA TENEI.

Ne tali atu ei a Petelu kia Iesu, TE ALIKO KAFAI KO KOE EILOA TENA, FAI MAI SAU FAKATONUGA, KE FANATU AU KIA KOE ILUGA OTE TAI, NE TALI ATU A IESU, VAU.

Kote manakoga o Petelu tenei, ne oko ei a ia, kise tulaga fakaalofa, ona mene seki mafai neia o fakataunu, ko ia ke sasale iluga ite tai kia Iesu. Te fakalave lave ikonei, ko Petelu ko matakū, ona kote malosio ote matagi, ko tena uiga ko toilalo aia I fakalavelave tupu ote olaga, ko saga malosio atu aia kite fakalavelave, ako galo a tena fakatuanaki kia Iesu Keliso, E tenei ate pogai ne oko mai ei kia ia te tulaga ote fakalotolotolua.

E tenei foki loa te tulaga ote olaga e oko tatou kiei manafai, ko toilalo tatou I fakalavelave, mo pokotiaga ote olaga, ko saga malosio atu tatou ki mea konei, ilo te saga tonu o tatou kia Iesu Keliso mo tena fesoasoani.

I loto ite tala e lavea ne tatou ia Petelu ne seki tukutiakina ne Iesu, aua Iesu e alofa tonu kia ia, kae ona eiloa kote fakatamala mote vaivai ote

fakatuanaki o Petelu, o kilo tonu kia lesu mo tena mana, ne ala iei o fakalotolotolua, ne goto ei aia ki lalo ite Tai.

Taina Kouvaka, e talitonu au me e tenei foki loa te ata fakaasi ote olaga faka Kouvaka, Ao, me seai se olaga e faigofie, kae se olaga tela e fepakipaki ei tatou mo faigataga, fuifaiga mo fakalavelave, ona kote olaga faka Kouvaka.

Ko toe fakamasaua mai kia koe mo au, ko taua kese fakalotolotolua I taimi o fakalavelave, kae e taua, ko tatou ke kilo tonu kia lesu mote fakatuanaki, e toka filemu ei te olaga.

MANATU LUA: Te fakalotolotolua e oko mai manafai tatou ko matakua kae galo te fakatuanaki.

Ite feagaiga fou, e fakamatala mai ei ate fakatuanakiga faka Kelisiano, tela kote fakana mote fakalagolago kite Aliko mo tena finagalo. Talitonu tatou me e tenei foki loa te loto ote Aliko mo tatou ana fanau, e maua foki ei ne tatou te olaga fiafia kae filemu.

Tela la e taua ke fakatumau te tou fakatuanaki, ke moa tatou e pela mote mea ne tupu kia Petelu, tela ne fakatulaga muamua neia te matakua ilo tena fakatuanaki kia lesu Keliso, ne oko mai ei kia ia te fakalotolotolua.

E taua ke iloa ne tatou me kafai ate olaga ko fakavae kite matakua kae galo te fakatuanaki e aumai faeloa neia kia tatou te lotovaivai, kote mea kese mafai ne tatou o fai a mea kola e loto kieie ate Atua, ese mafai foki o isi se fesokotakiga lei kae gali o tatou mote Atua.

Kafai foki te olaga ko fakavae kite matakua kae galo te fakatuanaki, kase mafai e iloa tatou o fai mo Kelisiano fakamaoni, iloto ite Galuega ate Aliko. E tenei foki loa te mea ne tupu kia Petelu, ne seki mafai ei neia o sasale iluga ite Tai, ke oko ia kia lesu.

Fai mai te muna ate Atua ite Salamo 37: 5--- TUKU ATU KATO A KOE KITE ALIKI, FAKATUANAKI KIA IA, KAE KA FESOASOANI A IA KIA KOE. Se foaiupu e fesoasoani mai ko tatou ke tu mautakitaki ite tou fakatuanaki kite Aliko, ake moa tatou e matakua ki fakalavelave mo fuifaiga ote olaga nei, e pela mote tulaga fakaalofa ne oko kieie a Petelu.

Fanau kouvaka, ko toe fakamalosi mai, Ke moa taua e fakalotolotolua, Ke moa taua e matakua ki fakalavelave tupu ote olaga nei, kae maise iloto io ta olaga fakakouvaka, ke fakatumau tou fakatuanaki kite Atua tela e Alofa tonu kia koe mo au.

E tenei foki loa te pogai ne vau ei aia kite lalolagi nei, e auala I tena Tama Fagasele ko lesu Keliso, kote mea ke maua ne tatou, mote lalolagi katoa ate ola, ko tena manumalo foki e fusi fakatasi ei tatou mo Kelisiano ite lalolagi e auala I tena Alofa Faivasaga. E manuia kae filemu ei te olaga, nei kite se gata mai. Amene!

MO TALAVOU

Aso loapo

Pelesitene Talavou Aoao

GASUESUEGA A FANAU TALAVOU I LUGA I TE LAUMUA TENEI

Konei a polokalame kola ne fakafesagai mo te Talavou a te Ekalesia Kelisiano Tuvalu i luga i te laumua. Kae talitonu te loto me agaga fakatasi a polokalame konei mo nisi o fanau Talavou a tou Ekalesia kola e nofo i olotou fenua tonu. A polokalame konei ne aofaga katoa mo te fakamoemoega ke tumau a te olaga kaufatasi o fanau Talavou a tou Ekalesia, kae maise ko te olaga talitonu kae fakatuanaki ki te Atua.

I te po 2-3 o Aokuso, ko aso kola ko oti ne fakatulagagina ne te komiti o Talavou Aoao a te Ekalesia ke fai mo aso fakamanatu o Kautama Tuputupu. Kae i luga i te laumua ne tai tolo malie a te aso fakamanatu o Talavou ki te po 9-10 o Aukuso. I te aso ono tela ko te po 9, ne kamata ei a polokalame a Talavou i luga i te laumua nei i loto i te falekaupule o Fakaifou. Ne kaufakatasi katoa a talavou e lima (5) o tou Ekalesia i te laumua- Lofeagai, Fakaifou, Funafuti, Vaiaku mo Lofeagai. A polokalame ne fai katoa loa ki te fiafia ke oko loa ki te afiafi tela ne fakaotioti ei a polokalame o te aso ono tena.

I te po 10 o Aukuso tela ko te Aso Sa ne fai ei te lotu fakapitoa a Talavou i te fale tapuaki o Fakaifou i te itula e 10am. Te lotu ne takitakigina ne te faifeau Rev Fuiono. Piita fakatasi atu ei mo fanau Talavou kola ne

fai tusaga i te lotu tena. Te ulu o te aso o Talavou i te tausaga tenei 2014 e fai penei- "Iesu Keliso e katoatoa ei te olaga faka-Talavou." Mai loto i lauga o te lotu fakapitoa tenei a Talavou, ne toe fakamalosi aka ei ne te faifeau Rev Fuiono Piita i tena lauga- "Iesu Keliso e maua ei te toe fakafouga o te olaga faka-Talavou mai te masei ki te lei." Ne oti te lotu fakapitoa kae ne tali fakaalologina ne matua o Fakaifou ki se tutonu gali tela ko oti ne fakatoka ne latou mo fanau Talavou o te Ekalesia. Polokalame o te Aso Sa tenei, ne fakagaligali ki te tauga-pese mai Talavou e 5 i luga i te laumua nei ke oko e iloa ki te itula e 3pm. Ne kaufakatasi atu nisi o tavini faifeau ki luga i te polokalame tenei, kae maise ko lauga toto i loto i te fale. Tela ko fai mo akoakoga e sili i te taua ki olaga o fanau Talavou mo te olaga fano ki mua. Ne fakaoti a polokalame o te Aso Sa tena ki te Open Air tela ne fai i te Ulupuka Lukiluki i te itula e 7pm ke oko e iloa ki te 10:30pm. Ne pono a polokalame o te afaia tena mai te lauga fakafetai kae fakamalosi a te pelesitene o Talavou ko Aso loapo, pela foki mo te lauga fakafetai mai te faifeau tasi ko Rev Fuiono Piita- Kae ne fakaoti a faigamea ki te talosaga.

I te po 17 o Aukuso ne fai ei te fonotaga a te komiti fakatoka o te Talavou Aoao, tela ne fili ei te taipola fou mo te fateletelega o te Talavou aoao mo te sua tasi tausaga. Konei la a igoa o te taipola mua mo igoa o latou kola ne sui ne latou a te taipola tenei. Pelesitene ko te Aoao ia Aso loapo ne toe filifilia ke toe takitaki ne ia Talavou Aoao mo te sua tasi tausaga. Tokolua Pelesitene ko te Aoao ia Tefau Peia kae ne suigina ne te Aoao ko Fakavae. Tapa. Te failautusi ko te fanau ko Inge Kopke kae ne suigina ne te fanau ko Alisi Logo. Te Teutupe ko te fanau ko Merita Tito kae ne suigina ne te fanau mo Elesi. Lotonu. Te Faifeau tasi ko Rev Fuiono Piita. Mo te tausaga tenei 2014 ki te 2015 tenei te taipola fou o te Talavou Aoao o te Ekalesia Kelisiano Tuvalu.

Ne fai a te 23 Fonotaga a te EKT i te fenua ko Niutao mai te po 31/08- 16/09/14. Tela ne sui atu ei a te vasega Talavou Aoao ne te Pelesitene o Talavou ko Aso loapo. Mo te fakamoemoega ke fakaoko atu ne ia a te manakoga io me ko mataupu a Talavou o te Ekalesia ki loto i te Fonolasi a te EKT.

Mataupu Muamua – Fakamolemole ki te ipu o te Aso

Tapu o Kautama Tuputupu ke mafai o faulu ki te tusi tupe a te mafutaga a Talavou Aoao.

Tali: *Talia te mataupu tenei.*

Mataupu Lua: Fakamolemole ke isi aka se ofisa fakapitoa loa mo Talavou Tuvalu i loto i te Ulu Ofisa (EKT) kae ke fakateletelegina ne se Faifeau io me ko fanau Faifeau, ko te mea ke sagatonu loa a te tino tena ki polokalame mo avanoaga mo Talavou. Kae ko tena tiute i loto i te Ulu Ofisa ke fakapitoa loa mo Talavou fua.

Tali: *Talia ke fakatu ki loto i te structure kae ko te fakagaluega e tuku atu ki te Komiti Teuteu (KT) fuafua ki te isi o n e sene mo fakagalue.*

Konei a polokalame kola ko oti ne mafai o fakataunugina i loto i nai masina konei ko teka atu nei. Kae koi uke kii loa a nisi polokalame mo gasuesuega a te Talavou mo tena olaga faka-te-Agaga kae maise ko tena kilo ki mua mo te se manuia o Talavou mo te aso taeao, maise la i ei ko tulaga o fakatokatokaga a fanau Talavou Aoao mo te agai atu o tatou ki te Kilisiasi mo te Tausaga Fou. Mo te fakamoemoega ke tumau a te loto fia tavini kae talitonu o fanau Talavou o tou Atufenua ki Atua tela tapuaki tatou ki ei.

Fakafetai lasi

'TALA MAI I TE FONOLASI I NIUTAO

Rev. Fitilau Puapua

I te afa o te tolu i te fakaafiafi o te aso lima po 29 o Setema, ne tala i ei a te Manufofou mai i te uafu o Funafuti i tena auala ki Niutao, o ave a te toega o te usugafono ki te luafulu tolu o Fonolasi a te Ekalesia Kelisiano Tuvalu. A te aso ko oko e iloa i te gali mo te la ko fanaifo e iloa ki tena moega tumau. I luga o te uafu ko itakitaki e iloa i pasese kola e aofia i ei ko usufono ki te fonolasi mai i te ulu ofisa, e pena foki a usufono mai tua atu o Tuvalu kola ne seki maua mai ne latou a te malaga muamua a te usuga fonu ki Niutao. E aofia foki i pasese i te afaia tenei ko niisi usufono i luga i te laumua nei fakatasi mo niisi pasese Niutao, kola e malaga ki te tauliaga tenei o te motu pukupuku. Mai tua malie o te lua kae koi fakatokatoka

te Manufoalau ki te taimi e tala i ei, ne lavea atu a ofisa o te vaka ko tutulaki i kaugutu vaka i olotou togiga kena masani mo pulou. Ne logo atu matou me ko pilipili o oko mai a te kaumalaga a te Malu o te malo sili tela e takitaki mai ne te tokolua Ulu o te Malo, tena Malu Vete Sakaio e pena foki a te malo sili, tena Malu Namoliki Sualiki. Ne aofia foki i te kaumalaga mai i te faitu o te Malo ko tena Malu te Minisita o Akoga Talavou mo Tu mo Aganu, Fauoa Maani mo te loa o te Malo, tena Malu Ese Apinelu tela e aofia i loto i te usugafono a te Ekalesia. Ne lavea atu foki mai i usugafono a te Ekalesia, ko te Malu o te Failautusi Aoa o te CWM tena Malu Dr Collin Cowan tela foki ne malaga mai Singapore o fakatasi ki te Fono lasi tenei a te Ekalesia Kelisiano Tuvalu. I te afa tonu e iloa o te itula e tolu, ne lagona atu a masini o te vaka ko fakaola katoa kae ko te vaka foki ko gasue ki mua. A pasese ko oko e iloa i te fiafia kae ko te vaka ko fonu lei foki e iloa i te usugafono. Kae koi teletele atu te vaka ki te ava, kae ko fakailoa mai me i te vaka e afe ki Vaitupu. Pasese pela me ko fanoanoa aua e iloa ne latou me ka se oko matou ki Niutao i te taeao o te aso ono, kae ka oko po matou ki Niutao. E ui e iloa te tala tenei, kae ne fiafia pasese it e iloaaga ne latou me i te Manufoalau e afe ki Vaitupu o puke aka a te malaga a tino Niutao Vaitupu kola foki e olo ki te tauliaga o Niutao.

Kae ko fanaifo e iloa o goto a te la, kae a te tai, ko pela e iloa me ne mili ki se sinu ponuponu tela ko seai e iloa se pasese e mata fanoanoa, io me taitailua, kae ko fonu katoa i te loto fiafia mo te fia kilo ki te fenua gali ko Niutao. E pela mo te masani, ne fai a te pauna mai tua o te ono, fai te talosaga afiafi ko te mea e iloa ko tafola ifo ki lalo a tua o pasese o moe. Ko gali aka loa te pula mai o fetu o te lagi mo te matagi e tata mai e iloa ne ia a te motou vaka mai i te taumuli.

I te itula e sefulu tasi, kae ko kalaga mai kauvaka i te vaka ko tau i uta i Vaitupu. Ko niisi pasese kola ne to a moe, e leake nei me ko Niutao, tafuke aka, ki loto loa i ato o sala sausau me ko tau e iloa o fakamanogi, te foitino ko manogi su a tai, kae fai mai nei te tala me ko Vaitupu fua tenei. Ne leake foki la nei a pasese me ka gaki mai i pasese mai i te malaga Niutao Vaitupu, ko tu teu e iloa o Anipule, e Tasi kae Afe, kae sae aka mai i te kakega, ko Tinei, Falaoa mo te olotou taupou ko Mailua mo niisi o te tino lua tupu o te kau malaga.. Te

usugafono ko oko e iloa i te fiafia me ko katoa mai a latou katoa kola ka olo atu ki te fakalavelave tenei i Niutao. I te afa o te itula e lua i te vaveao kae tiaki ne matou a Vaitupu i te motou auala ki Niutao. A te Manufoalau ne sai i te ava mai tai o te faitu ki muli i te itula e sefululua i te tutonu. A te kau pasese katoa ko uate valevale fua i so se kogakoga o te vaka. Ko oko loa a te gali o te aso mo te tai, kae ne lavea atu foki ne matou a te Vaka o Mckenzie, e tau mai foki i te aloalo o noganogoa i te tutonu tenei. Kafai e kilo aka ki uta i te fenua, e lavea atu a te tokouke a tino e tutu mai uta mo mea fakateletele. A pasese ko manako fua ke na oko latou ki uta. Ne talitali aka a pasese i poti i te taimi ko oti ne avaka ei a te malo sili mo te tokolua ulu o te Malo e pena foki te su a minisita i te poti muamua. Mai i te ava i Mulii ne toe talitali atu a pasese i motoka mo tulakita ki te fakai. Matou ne oko atu ki te Fale kaupule Fetu-Afiafi II Kae ko toka mai katoa te fenua fakatasi mo te usugafono mai i Matu mo Nui, mo Nukufetau. E pena foki latou kola ne olo i te malaga muamua. Fetu afiafi ko teu e iloa ki ona lakeiga fakamau, kola ko iloga e iloa o te fenua tenei ko Niutao. A ona poulotu mo pui paletito e teu katoa ki laukie lanulanu tela ko te lanu uli, kula mo te kena.

Konei e iloa lanu masani o te Niutao, tela ko te olaga poulii mo te fapaupau. Te lanu kula ko te toto maligi tela ko te toto o te matulo mo te kena ko te mainaga o Tala lei. Ne lavea foki i ona pui e teu ki mea taulima faka-Niutao tela e kese a te gali ko kilo ki ei te kaumalaga ftoa lavea ne latou Fetu-afiafi II. Ko oko e iloa te gali o tena a atu-fale kola e pae katoa ki pae fakalaina ki sameni ko oti ne pae fakagaligali. A te Falesa e tu tonu e iloa i te kano loto o te fakai kae kena ma e iloa i te lase ke oko ki tena titi e tao katoa ki te kilikili fou. Ko te fale o te Faifeau ko gali aka loa tena valenda e fakaoso mai ki te faitu auala. Ko te fale Misi ko oti ne peeni fakagaligali mo ona potu mo koga koukou. I te fetu ki Kulia e fakalava mai ei ko te fale mo tupulaga Talavou tela e fakaigoa ki Tugaki Fou.

A te usugafono mai i te laumua konei ne ftoa oko mai, ne kai katoa i te fale kaupule tenei, ko te mea loa ko vaevae ki olotou fatama.

I te aso sa po 31 o Aokuso ne tala aloaia ei a te luafulu tolu o fonu lasi a te Ekalesia Kelisiano Tuvalu i luga o Niutao. Ne maopo katoa a te usuga fonu

fakatasi mo tino o te fenua ki loto i Tinei Fale II mo te Lotu fakapitoa i te itula e sefulu i te taeao. Ne takitakigina a te lotu fakapitoa tenei ne te Failautsi Aoao o te Ekalesia Kelisiano Tuvalu, Faifeau Tafue Lusama kae ko te lauga fakafeiloai ki te usugafono mai i te faitu o te fenua ne fakatokagina ne tena Malu Sir Toomu Sione. Ko te lauga tala o te fonolasi ne fakatokagina ne te Malo Sili tena Malu Namoliki Sualiki, e pena foki mai i te Malu o te tokolua Pelesitene Faifeau Tofiga Falani. Ne maua foki te avanoa mo te Malu o te Failautusi Aoao o te CWM ke fai sena faipatiga i te taimi tenei. A te Muna fakavae mo te luafulutolu fonolasi tenei, e penei, TE ALIKI, MANAVA MAI KIA MATOU A TOU MANAVA OLA. (Esekielu 37:1-9 A lauga katoa o te aso tenei fakatasi mo suksesukega katoa ne fai i te vaiaso ne soko mai, ne fakaaatu katoa ki te Muna Tuku tenei. Ko te fakamoemoega maluga, ke toe fakamalosi a te Ekalesia kelisiano Tuvalu ke lavea ne ia a te taua o te manava mai o te manava ola o te Atua, ke mo a e loto vaivai i te fakatino ona tusaga fai, kae maise ko tino takitokotasi o te Ekalesia ke oko ki kaiga mo takitauavaga, ke oko ki fanau Talavou mo Vasega katoa a te Ekalesia, ke maua ne latou te manavaga ola o te Atua, tela ko tena Agaga Tapu, i te faiga o tena Galuega.

A polokalame a te fenua ne fakasoko i te otiga o te Lotu fakapitoa ne tala ei a te luasefulu tolu o Fonolasi a te Ekalesia Kelisiano Tuvalu.

I loto i te vaiaso katoa muamua tenei, a usufono ne fakafeagai mo te toe kilokiloga ki te toe fakatokaga o te Fakavae Tusi a te Ekalesia Kelisiano Tuvalu e pela mo te ikuga fono o te Luafulu Lua o Fono lasi i Nanumea. E uke a vaega o te Fakavae ne faipatigina e kamata mai te toe fakatulagaga o te Ekalesia; Ko te litaeta o faifeau ke tuku ifo ki te onosefulu lima tausaga i lo te fitu sefulu tausaga, mo niisi mataupu e uke kola e tu katoa ki te Fakavae.

I te toe vaiaso o te fonotaga ne fakaavanoa mo mataupu katoa a Ekalesia mo kaulotu. A mataupu katoa mai Ekalesia ne faipatigina katoa ke oko eilola ki mataupu a vasega mo fakapotopotoga. E pela eilola mo fonotaga masani, e kesekese eilola a manatu o usufono takitokotasi kae ne fakaiuku katoa a mataupu mo te manuia. E isi ne nai mataupu pela me ko

mataupu lasi o te luafulutolu Fonolasi i Niutao, tela e aofia i ei; 1. Ko te Litaeta o Faifeau ne talia ke onolima tausaga.

2. ko te Faifeau ke fili eilola ne te Fenua mo te Ekalesia tena faifeau, ne seki talia. Ko Faifeau fauu e toko iva ne talia; Tevasa mo Samila, Tehulu mo Mauga mo Sagale, Tupou mo tena avaga, Patala mo Fetulele, Mai i tafa o latou e faoopoopo atu ki ei ko Maina Talia mo Laigane, mo te tokolua tamaliki mai Kioa.

3. Ko te fakamafuliga o faifeau mo te sua fa tausaga ne talia ke penei; (onoono ki te pepa te Failautusi Aoao – posting)

4. Ko te filiga o Ofisa fou o te Ekalesia ne manumalo ei a tena Malu Faifeau Penitisi Taeaia i te tofiga fou o ia ko te Pelesitene o te Ekalesia Kelisiano Tuvalu. Ko tena Malu Tofiga Falani ne tumau ko ia Ko te tokolua Pelesitene. Ko te Failautusi Aoao, e tumau tena Malu Tafue Lusama mo te teutupe tena Malu Petaia Meauma ne tumau foki i tena tofiga tena.

6. Fakaoti mataupu ki te mataupu e uiga mo te fenua mo te Ekalesia ka talimalo ne ia a te luaseulu fa o Fono Lasi a te Ekalesia Kelisiano Tuvalu, kae ne taliagina ko te Ekalesia a Vaitupu ka fai ei te Fono lasi i te 2016 i te masina o Novema..

A te luafulutolu o Fonolasi i Niutao ne pono i te Aso Sa po 14 o Setema. A te lotu fakapitoa mo te ponoga tenei ne takitakigina ne te tokolua pelesitene, tena Malu Faifeau Tofiga Falani kae ko te Muna ne fakatokagina ne tena Malu te Pelesitene fou o te Ekalesia Kelisiano tena Malu Faifeau Penitisi Taeaia.

A toega o polokalame a te fenua ne fakasoko atu loa ke oko ki te Aso tolu tela ne tala i ei a te Aso fakamanatu o te Setema o Niutao. I te taeao ne fai i ei a te lotu fakapitoa tela ne takitakigina ne te tofi o te fenua, tena Malu Faifeau Isopo Sioni kae ne fai tusaga i ei ko taina faifeau mai i te fenua ko Niutao. E tenei foki a te avanoa ne tuku atu ei ki lima o te Ekalesia Kelisiano Tuvalu a te taulaga mo te mealofa a te Fenua mo te Ekalesia Niutao, e tusa o te lima selau afe tala Ausetalia. Ne molimoli a te fakafetai lasilasi a te Ekalesia Kelisiano Tuvalu ki te fenua mo te Ekalesia a Niutao e tusa mo te mealofa lasi tenei.

I aso fa i te fakatutonu, ne lagona te faigata i te usugafono o faka-tofa kit e enua mo te Ekalesia a Niutao, ona ko te gali o te mafutaga tela ne fakafeagi i luga i te fenua gali ko Niutao, kae ne nofo maina te usugafono me ko oko mai eiloa a te taimi, ko tau i ei o toe foki te malaga ona ko tiute mo galuega e fakatali mai. I te fakatutonu foki eiloa o te aso tenei, ne fai a te kaiga i te tutonu, soko atu mo te fatele, fai mo lauga fakamavae ko te mea eiloa ko fakatokatoka te usufono me ka tuku ifo a pasese ki tai i te vaka.

E fia fakaoga ne te lama o te masina tenei o Setema 2014 a te avanoaga tenei, o molimoli atu eiloa a te fakafetai, fakafetai kae toe fakafetai atu Niutao, mo te tusaga lasi kae gali ne fai ne koulua mo te Ekalesia Kelisino Tuvalu. E talitonu matou me ne fai a te oulua tusaga mo te loto alofa, mata fiafia kae ne fai ki te mea e mafai ne koulua. Niutao malo fai o te faiva. Ko paku tau umu kae ko to foki tou manava me ko maea tou tauliaga. Ko talosaga a te usugafono katoa o te luasefulu tolu o Fono lasi a te Ekalesia, ke toe tau i atu kae ke ligi faka ua atu ne te Atua ana fakamanuiaga ki te oulua laukele mo te uluniu ke oko ki te moana mo te vanimonimo. Ke alofa foki te Aliko o fakamanuia te oulua fale kaupule, Te Malu o te Ulualiki mo tena kau filifili, Malu o te ulu-kaupule mo tena kaiga kaupule. Malu te sina o te fenua ke oko eiloa ki tagata mo fafine e pena foki fanau foliki, kae maise ko tulaga faka-lupe o te oulua Ekalesia, i te alaala mai o te malie- o Fuatia mo pokia te kaufaigaluega ke oko ki kaiga katoa o te Ekalesia Tapu a Niutao, Muna tou Aliko Fakaola ko Iesu, me e se sili atu a ia tela e maua ne ia, i lo o ia tela e alofa o foaki atu ana mea ona ko tena igoa. Ke manuia koulua Niutao i te Alofa o te Atua.

POSTING MO TE SUA FA TAUSAGA 2015 - 2018

Rev. Tafue Lusama

PULEGA KI MATU	
Nanumea	Kitiona Tausi
Nanumaga	Livingstone Feleti
Niutao	Fuiono Piita (Faifeau Toeaina)
PULEGA I TE KOGALOTO	
Nui	Iosefa Mautinoa (Faifeau Toeaina)
Nukufetau	Selota Panapa

Vaitupu	Alamatiga Lusama
PULEGA I TE LAUMUA	
Funafuti	Paneta Maibuca (Faifeau Toeaina)
Vaiaku	Tofiga Falani (Tokolua Pelesitene)
Fakaifou	Ionatana Panapa
Lofeagai	Teloto Eli
Kavatoetoe	Isopo Sioni
Nukulaelae	Kalahati Kilei
Niulakita	Tupou Numela
PULEGA I FIITI	
Kioa	Alefaio Pine
Suva	Puafitu Faaalo (Faifeau Toeaina)
CHAPLAIN	
Fetuvalu	Sanaila Bici / Falemanuka Maitoga
Motufoua	Ulufale Vaitusi / Filipi Monia
EKT OFFICE	
Pelesitene	Penitusi Taeaia
Failautusi Aoao	Tafue Lusama
Failautusi o Tupe	Petaia Meauma
Failautusi o te Misiona	Kautoa Moloti / Teleke Peleti
Faifeau o te Fakai Masaki	Telala Noa
PULEGA KI TUA	
Fetu	Tufuga Inaki
Hawks	Alona Alona
Pukekohe	Henele Tekavei
Ranui	Pita Tanile
Malietasi	Telematua Ikinofu
Ekalesia Kaufakatasi	Teatu (Faifeau Toeaina)
Fagaua	Patala Talava
Loto Lelei	Sofala Lafita
Whagarei	Tehulu Mika
Masela	Kalepo Toai Vevea
Hawaii	Iosefa Kilisome
Nauru	
PROGRAM OFFICERS	
Peace and Justice	Maina Talia
Church and Organization	Tevasa Iakopo
Church and Society	Tehulu Mika
Evangelism & Publication	Mauga Vaulu

Scholarships	Master – Fitolau Puapua (PTC 2015 – 2016)
	BD – Sioraoi Opeta (Sept 2014 – June 2016)
Scholarship 2016	Manuka & Kautoa (BD – PTC CWM)
KOMITI TEUTEU	
Pelesitene	Penitusi Taeaia
Tokolua Pelesitene	Faifeau Tofiga Falani
Failautusi Aoao	Faifeau Tafue M. Lusama
Failautusi Tupe	Petaia Meauma
Faifeau Toeaina ki Matu	Fuiono Piita
Tiakono Toeaina ki Matu	Amosa Soani
Faifeau Toeaina Kogaloto	Iosefa Mautinoa
Tiakono Toeaina Kogaloto	Fialua Lisale
Faifeau Toeaina Saute	Paneta Maibuca
Tiakono Toeaina Saute	Lopati Tefoa
Faifeau Toeaina Fiiti	Puafitu Faaalo
Tiakono Toeaina Fiiti	Opetaia Selu
Faifeau Toeaina ki Tua	Teatu Fusi
Tiakono Toeaina ki Tua	Helina Telii
Sui o te FFEKT	?

MO FAFINE

Sulufaiga Uota

Talofa koulua i te itulau masani tenei mo Fafine. Te alofa mo te agalei o te Atua ko mafai ne tatou o maua se tausaga fou i te ola te manuia i te takitakiga filemu a te tamana alofa.

Te muna ko aumai ne au ke onono fakatasi tatou ki ei e maua mai I te losua 1:9. Ne fakatonu ne te Atua a losua ke loto malosi mo tena fakamoemoega me ko losua ka fakaoko ne ia te malaga a te fanauga Isalaelu ki te fenua o te feagaiga. Ne fakaalaala kia losua tulaga kola ka mafai a ia o oko kiei, e pela mo te loto tukaki, te loto fakavaivai, te loto foki ki tua. Ne tulaga kola e mafai o fakalavelave ki ei te malaga ke fakataunu ki te fenua ne moeakigina ne te fanauga Isalaelu, tela ne faimalaga ei latou mai loto I Aikupito. Sose tulaga faka tukaki loto, lagona mo mafauauga kola e faka ala ne ia te se fano

ki mua o te malaga a te fanauga a isalaelu, konei tulaga kola e manako ki ei te Aliko ke fakaseai I loto mo mafauauga o te takitaki kalagagina tenei ko losua. Te pogai taua e tau o fakamalosiaina ko te fakanaa fakalagolago ki te malosi mo te takitakiga a te Atua tafasili I te maluga. Aua ko ia ne kalaga ne ia losua ki te galuega. Ko ia foki e fakamalosi ne ia te loto o ia losua, kae ko ia foki te takitaki sili tela ka mafai ei ne losua mo te fanauga katoa o Isalaelu o maua se loto fai ki mua ko te mea ke mafai o taunu manuia te faiga malaga.

Te fakatonuga a te Atua ne fai kia losua ke loto malosi kae ke loto talitonu. Tela la e taua ke tuku katoa tena talitonu i te Atua me ko ia ka aumai ne ia te malosi katoatoa ki luga ia ia. Te loto talitonu tela e tau o fai ne losua, ko te tuku katoatoa tena loto mo tena talitonu ki te Atua. I nisi fakamunaga ko losua ke seai se loto mataka ia ia o tuku tena talitonu ki luga i te Atua, ke fakagata tena mafauauga faka te tagata i tena malosi. Ke fakagata tena lagona i ana aofaga fai kae fakavae ki tena malosi faka te tagata ka mafai ei ne ia o fakataunu tena tulaga faka takitaki o te fanauga i tena malaga o ulu atu ki loto i te fenua o te feagaiga. Ko te fakanaa katoatoa ki te Atua ke takitaki ne ia tena tavini tenei i te fakamoemoega tela ko kalagagina a ia i ei. Me kafai e tuku katoatoa te loto mo te mafauauga kae ko katoatoa ei te tulaga talitonu o koe ki luga i te Atua.

Mo taua fafine i te tausaga ko saelegina tenei, e fakataua ke toe kilo taua ki luga i te fakatonuga ne fai ne te Atua kia losua ke loto malosi kae ke loto talitonu. I sose saelega e fakafeagai mo tatou, e taua ke tuku katoa te tou loto mo te tou mafauauga ki te Atua I tona alofa mo tena malosi. Me koi a e aumai ne ia sose malosi tela e manakogina mo tatou ke mafai ei ne tatou o fakataunu tulaga o tiute kalagagina o tatou, tulaga o sose fakamoemoega i tena takitakiga alofa. E tau o fakamaluga ne tatou me i te fakanaa ki te Atua alofa e fakatoka katoa ne ia tulaga katoa o sose saelega ke iku mo te manuia.

Ke manuia koulua matua I te alofa o te Atua.

TALA MO TAMALIKI

Walter Pulogo Kaua

Te tala mo tatou tamaliki ite taimi tenei e fakaulutala penei “**Ko te Sotia Ioto Talitonu**”. E isi se sotia e tokotasi, tela a ia se tino talitonu ki te Atua i tena olaga katoa. A te igoa o te sotia tenei ko Peter. Ite taimi koi foliki ei a Peter, a ia ne akoako ne tena tamana mo tena matua ke iloa ne ia o faitau te Tusi Tapu kae fakaakoako foki ke iloa ne ia o ‘talo, penei e iloa mo koutou tamaliki. A te kaiga o sa Peter e masani sale o olo ki lotu kae fai talosaga sale i taeao mo afiafi katoa. Fai mai la te tala e tamaliki, ne ulu a Peter kite akoga lasaga muamua tela ne iku manuia ei ana taumafaiga. Ne toe fakasoko atu ana akoakoga ki akoga lasaga lua, tela ne iku foki mote manuia a akoakoga a Peter. Ite otiga o tena akoga lasaga lua ne maua tena avanoaga o akoga pela mese sotia, tino kola e olo sale kite taua o tausi te filemu.

Ne fialia kii loa a Peter ia ia ko taunu ana fakamoemoega ke fai a ia mo sotia o tausi te filemu. Kae ite taimi tenei, a Peter e se mafai loa o puli ia ia a akoakoga a ana matua, a ia e fai faeloa ana talosaga i taeao mo afiafi katoa kae maise o faitau foki tena Tusi Tapu. Ite aso e tasi, ne fili ei se potukau foliki ke olo o fakakoako ki mea tau sotia ise koga tela e tu iloto ite vao, tela ne ‘to iei a Peter ite filiga tenei ote kau konei. Fai mai la te tala, ne malaga a latou konei kite koga tela e akoga ei latou ki mea tau sotia ite vao. Tela a tulafono mo mea katoa iei ko tau katoa o tautali ne fakalogo latou kiei. Kafai te tino e se tautali kiei ka fakasala a ia.

Ite olotou okoatuga kite koga tenei, ne vau te tino tela e pule ne ia latou o fakamaina katoa a tulafono mo fakanofonofoga o te koga tenei. Muna te pule tenei o latou, a koutou e ‘tau faeloa o tautali ite taimi mo polokalame katoa e avatu ne au, mooa loa ma tuai se tino ia koutou. Tela latou e masani sale loa o ala koi vaveao o olo o tele ite vao. Ite vaiaso muamua o latou, a Peter e tuai faeloa o fano kite koga tela e maopopo iei latou koi tuai o tele latou. Tela ite taeao e tasi, ne tuai atu foki a Peter kite foleni a latou, tela ne faka’tu ei a ia ne te pule tenei o latou i mua o nisi tamaliki kae fai atu, Peter kaia koe e masani faeloa o tuai mai ki te maopopoga a tatou i taeao katoa? Ne tali mai a Peter penei, tou malu, au e masani o tuai sale mai ona ko au e nofo sale o fai taku ‘talo koi tuai au o

vau ki konei. Ne toe fesili atu tena pule, koe e nofo o ‘talo?, sea te ‘talo tena e fai ne koe, a kooi foki tena e ‘talo koe kiei? Ne toe tali atu a Peter, au e talo sale ki te Atua ola tela e talitonu au kiei ke tausi ne ia au. Ne fai e iloa ne fakafesililiga a te pule tenei kia Peter i mua e iloa o tamaliki. Tela ne fai atu ei te pule kia Peter penei, ko lei la, e pena e iloa mo tau molimau i te Atua o koe se Atua e ola. Au la nei e fia lavea ne au me tonu loa e mafai ne tou Atua tena o fesoasoani kia koe ite mea tenei ka tuku atu ne au kia koe. Tela ne uga atu ei ne ia a Peter ke fano o fakatele mai te motoka e tu mao mai pela ki ona mua. A te motoka tenei e tamaliki, fai mai, ko leva loa ne tu penei meko masei, e seai se masini o ia iloto, kote foitino motoka fua e tu mai. Tela ne mu katoa loa iei a tamaliki ite taimi tenei. Ne pei atu te kii ote motoka tenei nete pule o latou kia Peter ke fano o fakatele mai. A Peter ite taimi tenei e iloa kii loa ne ia te fakalavelave tenei kite motoka, kae ui ei ne fano e iloa a ia ona mese fakatonuga kia la mai tena pule. Ite okoatuga a Peter kite koga tenei e tu iei te motoka masei tenei, ne fai tena talo kae tagi, oti ulu ei a ia ki loto ite motoka.

Tamaliki, sea te mea ne tupu? Ne sulu ne ia te kii o te motoka fakaola ei ne ia te motoka. E tasi e iloa te fakaolaaga ne Peter te motoka mea loa ko ola. Ne tele mai mo ia faka’tu loa i mua o te olotou pule mo tamaliki. Ne sopo ifo ki lalo a Peter sasale atu ei o avatu te kii kite olotou pule. Ne fakasiga ifo te olotou pule tenei kae tagi mo ana pati penei kia Peter. Peter, au e fia tavini kite Atua tena e talitonu koe kiei, seai e iloa se mea fakafoofogina ne lavea i toku olaga katoa ne pau mote mea ne fai ne koe ite taeao tenei. Fakamolemole au e fia talitonu kae tapuaki ki tou Atua. Tela ne faka’tu aka ki luga ne Peter kae fai atu, ke fakamanuia koe ne te Atua i tou loto talitonu tena.

E tena te tala mo taua tamaliki mote taimi tenei, fakamoemoega maluga ne fialia koulua o faitau kae fakalogologo mai kiei. Ke oko kite sua taimi penei ite



FANAU FAUU A TE EKALEZIA

Igoa o te Faifeau: Mauga Vaulu
Igoa o te Faletua: Sagale Mauga
Akoga: Kanana Fou Theological Seminary
Tausaga ne akoga iei: 2003 - 2007
Pepa ne maua: Diploma in Theology
Fenua & Ekalesia: Ekalesia Vaitupu



Igoa o te Faifeau: Tevasa Iakopo
Igoa o te Faletua: Samila Tevasa
Akoga: Malua Theological College
Tausaga ne akoga ei: 2004 – 2007
Pepa ne maua: Diploma in Theology
Fenua & Ekalesia: Ekalesia Funafuti

Igoa o te Faifeau: Patala Talavaofenua
Igoa o te Faletua: Fetulele Patala
Akoga: Kanana Fou Theological Seminary 2005 - 2010
Tainan Theological College and Seminary 2011 - 2013
Pepa: Diploma in Theology, Bachelor of Divinity – MTh
Pending
Fenua & Ekalesia: Niutao






Igoa o te Faifeau: Tehulu Mika
Igoa o te Faletua: Fono Tehulu
Akoga: Kanana Fou Theological Seminary
Tausaga ne akoga ei: 2003 – 2008
Pepa ne maua: Diploma in Theology
Fenua & Ekalesia: Ekalesia Nanumaga

Igoa o te Faifeau: Ulufale Vaitusi
Igoa o te Faletua: Aggie Ulufale
Akoga: Kanana Fou Theological Seminary
Tausaga ne akoga ei: 2005 – 2010
Pepa: Diploma in Theology & Bachelor in Divinity
Fenua & Ekalesia: Ekalesia Niutao



Igoa o te Faifeau: Tupou Numela
Igoa o te Faletua: Ipu Tupou
Akoga: Pacific Theological College
Tausaga ne akoga ei: 2006 – 2007
Pepa: Certificate in Theology & Diploma in Theology
Fenua & Ekalesia: Ekalesia Nanumea


NIISI ATA MAI TE FONO



Lei Honolulu & Pisila Telii



Rev. Alona Alona & Late Poolo Taukave



Toeaina i Niutao



Rev. Tafue Lusama



Rev. Dr. Collin CWM Secretary



Rev. Penitusi Taeaia

